

欽定大清會典事例

欽定大清會典事例卷二百七十

戶部

蠲恤

安節孝 救災

恤薄宦

矜罪囚

撫恤

安節孝○乾隆十年覆准孝子節婦中有貧  
守志難以存立之人或至飢寒失所較之泛常  
孤貧尤宜矜恤令該省督撫分飭州縣覈實取  
具鄰佑印官各結詳報酌給口糧俾存活有資  
不致失所仍將動用款項數目造冊報部○道  
光元年奏定粵東省城設立恤養公局於糧道  
庫儲普濟堂經費項下每年動支銀五千兩按

現在查出節婦之數。以老年年久者一千二百五十口作為定額。每年每口給養。贍銀四兩。餘俟缺出挨次充補。年終造入普濟堂奏銷冊內覈銷。

恤薄宦。○乾隆元年

諭。各省縣丞主簿典史巡檢等微員。嗣後離任身故。實係窮苦不能回籍者。該督撫於存留公項銀內。酌量賞給還鄉路費。每年造冊報銷。○二年

諭。染瘴身故人員。奉職邊遠。不幸因瘴殞生。深可憫惻。自應酌量加恩。將來作何定例拯卹。並變通之處。著

大學士會同該部詳悉定議具奏。欽此。遵

旨議奏。酌量品級之大小。回籍道路之遠近。家口人數之多寡。於存公銀內。按數動給路費。嗣又議准廣東省崖州。感恩。昌化。陵水等四州縣。正雜官染瘴身故。應給路費。計日扣算。州縣。樞。櫬一具。水路日給銀四錢。陸路八錢。佐雜官。樞。櫬一具。水路日給銀三錢。陸路六錢。各故員親屬。棺。柩。每具。水路日給銀一錢五分。陸路三錢。各故員家口。水路。每大口日給銀一錢。小口五分。陸路。每大口日給銀一錢五分。小口七分五釐。水陸

兼行者。照議分別給費。如故員家口少。程途近。按名按日計路。扣算路費。每千里不及十兩者。仍照千里給銀十兩之例支給。再崖州等四州縣赴司請領公費。往返遲延。即就近在海南道今改雷庫耗羨銀內先行照數支給。一面報明移還。其自省至原籍路費。於司庫存公銀內支領。又議准。廣西省泗城鎮安太平慶遠思恩等府染瘴病故之員。知府每站給銀三兩六錢。丞倅州縣給銀二兩四錢。佐雜微員。遇有病故休致。以及因公革職。照新例每千里給銀十兩。

身故者加扶櫬銀八兩。其千里以外每百里給銀十兩。不及百里毋庸支給。知府丞倅州縣等官應給路費。該州縣開明站數申報給發。毋庸具結。佐雜微員結報批准動給。○十四年題准微員回籍賞給路費。查節年各省酌給銀數有計算人口大小支給者。亦有籠統酌給者。有分別水陸程途里數支給者。亦有按每百里每千里約計省分遠近覈給者。亦有按其無力等次分別給予者。辦理參差殊不畫一。嗣後各省縣丞以下等官如遇病故休致因公革職並無侵

貧重款窮苦不能回籍者。不論家口多寡。每千里給銀十兩。按程途扣算。身故者不論遠近。加扶觀銀八兩。州縣官出結。府州加結。藩司於存留公項銀內覈實支給。不得額外加增至各省教官有相隔本地五百里以外。實係艱窘不能回籍者。亦照此例支給。○三十年議准。微員父母身故。一例支給扶觀銀兩。○嘉慶二十五年。議准。各省八品以下文員。無論實缺委署。任所差所病故。距原籍二千里以外者。俱給予夫馬勘合。毋庸再給路費。在二千里以內者。

仍給路費。不准給予夫馬。試用人員奉委出差署事。係在署任差所病故者。一律照辦。

矜罪囚。○原定刑部南北兩監囚糧。及各城門枷示之犯。無家屬送飯者。日給倉米一升。每季在部支米三百石。以昭矜恤。夏給冰水。冬給棉衣。並鐙油藥餌諸費。在刑部秋審項下開銷。○

雍正十年題准。貴州省每年囚糧。在秋糧耗米內撥給。○十一年題准。直隸省每囚一名。日給米一升。錢五文。米動支倉糧。錢每千折銀一兩。動支耗羨。○十二年題准。山西省每囚一名。日



給米一升。錢五文。動支耗羨銀。河南省每囚一名。日給米一升。錢五文。囚糧於倉穀內動給。錢於耗羨內支銷。福建省每囚一名。日給米八合。銀四釐。額徵囚糧銀內動支。陝西省西安每囚一名。日給米一升。錢五文。米動常平倉。錢動公用銀。甘肅省每囚一名。日給米一升。錢五文。米於額徵存留糧內動支。如有不敷。及並無存留糧米者。每糧一石。折銀一兩。同應給之錢。均於藩庫公用銀內支給。四川省每囚一名。日給米一倉升。錢五文。除動用官基地租銀租米外。其

不敷銀。在存公銀內動支。棉衣一件。工價銀四錢七分六釐。單褲一條。工價銀一錢四分八釐七毫五絲。亦於存公銀內動支。廣東省每囚一名。日給米一升。於徵收耗米內支給。銓油柴鹽銀五釐。於屯糧耗米內支給。棉衣銀於火耗內支給。○十三年題准。奉天省每囚一名。日給米一升。大制錢五文。又每囚一名。給棉衣工價銀八錢至一兩不等。米於徵收地米內支給。錢照時價合銀。於本省贖罰銀內動用。不敷銀。於田房稅契銀內支給。山東省每囚一名。日給米一

升。大制錢五文。米每石折銀一兩。制錢每千折銀一兩。均於存公銀內支給。安徽省每囚一名。日給米一升。錢五文。於獄田租銀租米並常平倉糧存留公項銀內動支。江西省每囚一名。日給穀二升。錢五文。折銀五釐。其動支銀穀。於存公銀內報銷。湖北湖南兩省。每囚一名。日給米一升。錢五文。折銀五釐。於原有額設及捐置有獄田之司府州縣支給。其有不敷。及原無額設囚糧之州縣。於公項銀內動支。廣西省每囚一名。日給米一升。油薪鹽菜錢五文。於額徵地丁

銀內支給。如有不敷。於存公項下動支。○乾隆元年題准。江蘇省每囚一名。日給米一升。錢五文。於獄田租銀。租米。及常平倉糧存留公項銀內支給。○又題准。雲南省每囚一名。日給米一京升。柴菜錢五文。遇閏加增。小建扣除。米於獄田及常平倉項下支給。錢於公項下動支。○二年題准。直隸省每囚一名。給棉衣一件。折銀五錢二分。棉褲一條。折銀二錢八分。於自理贖銀內支給。山東省每囚一名。給棉衣一件。價銀五錢。棉褲一條。價銀三錢。於自理贖銀內動

支。如有不敷。於存公銀內支給。河南省每囚一名。給氈帽一頂。價銀五分。棉襖一件。價銀六錢。棉褲一條。價銀三錢五分。藥餌每劑價銀二分。棺木每具價銀一兩。動支自理贖銀。如有不敷。於耗羨內撥給。江西省每囚一名。給棉衣一件。工價自二錢五分至七錢二分不等。其動支銀於外結贖銀內報銷。福建省每囚一名。給棉襖一件。折銀六錢四分。棉褲一條。折銀三錢四分。於自理贖銀內開銷。甘肅省每囚一名。給棉衣一件。價銀自六錢三分至一兩不等。又

每名給煤炭銀五釐。每年約計共支銀一百八  
九十兩不等。每年除自理贖銀動支外。不敷  
銀。於司庫公用內找支。貴州省每囚日給燈油  
柴水鹽菜錢五文。遇冬給棉衣一件。報銷銀四  
錢五分。患病每日用藥一劑。報銷銀一分五釐。  
病故給棺木。每具報銷銀一兩。○又議准。各省  
發遣軍流及一切遞解人犯。照囚糧之例。給予  
口糧。於存公銀內動支。年底造冊咨送刑部。查  
明人犯數目程途遠近。轉咨戶部覈銷。○三年  
議准。江蘇省所屬繫獄罪囚。有赤貧之犯。緣事

繫獄家口不能逐日送飯。一例給予口糧油鹽等費。湖北省每囚。夏月酌給席扇茶葉。冬月生薑草薦。各照時價。均無定數。棉衣一件。價銀四錢。服藥一劑。價銀一分。病故給棺木銀八錢。湖南省每囚。夏月各酌給扇一把。銀四釐。席一條。銀三分。茶葉銀無定。冬月日給炭銀五釐。薑銀五毫。草薦一條。銀一分。棉衣一件。銀四錢。每藥一劑。銀二分。○又議准。各省贓贖銀兩。停其解部。留充獄囚棉衣藥餌棺木等項之用。○五年奏准。軍流徒三項人犯。一體於存公銀內給予

口糧。又奏准。凡緝獲命盜案內人犯。移解收審。其口糧亦應一體支給。令緝獲起解之該省督撫。將緝獲日期。先行咨部存案。年底彙題數銷。至督撫司道及府州縣等衙門自理案件。或關提質訊。或遞解安插。所需口糧無多。地方官酌量辦理。秋審人犯解省候審。及審畢遞回。沿途口糧。應歸入囚糧案內支銷。○六年議准。奉天省各屬外結徒犯。並自理笞杖。及

盛京刑部甯古塔等三處。咨送輕罪解回原籍人犯。一律給予口糧。咨部數銷。○又議准。順天直



隸省軍囚人犯。每名日給口糧米一升。燈油薪菜錢五文。於存公銀內支銷。奉天省軍流遞解人犯。按程日給制錢十五文。於贓罰及雜稅銀內支銷。山東省軍流發遣及遞解人犯。每名日給制錢十二文。於耗羨銀內支銷。山西省軍流人犯。每名日給米一升。省南州縣。每米一升。折給銀一分。省北州縣。每米一升。折給銀九釐。於耗羨銀內動支。河南省軍流發遣及遞解人犯。每名日給米折錢十五文。於存公銀內支銷。江蘇省軍流發遣及遞解人犯。行程一百六十里。

給口糧米一升。錢五文。於耗羨銀內支銷。安徽  
省軍流發遣及遞解人犯。每名日給米八合三  
勺。於常平倉穀內支銷。江西省軍流發遣及遞  
解人犯。每名日給米一升。錢五文。每行程五十  
里作為一日。於耗羨銀內支銷。福建省軍流發  
遣及遞解人犯。每名日給米一升。於存公銀內  
折給。○七年議准。各省收到軍犯。無論有衛無  
衛之地。俱發各州縣收管。如老病殘廢。撥入養  
濟院。給予孤貧口糧。其挾有微資。習有手藝者。  
交地保守管。聽其自為謀生。其少壯軍犯。按照

地方分派各衙門。勻撥一二名。充當水草夫役。日給本身口糧銀二分。以資食用。實係貧窮者。初到配所。該管官照孤貧例給予口糧。一年之後。有驛遞地方。交驛遞夫頭管束。令其當差。無驛遞地方。查有公用夫役之處。令其充當。交夫頭管束。均給以應得工食。○八年題准。福建省囚糧。每米一石。定價銀九錢發給。不敷。隨時酌辦。於常平倉穀內。令各州縣動支碾米給散。仍將額徵折價。撥給原動倉穀之州縣。儘數買補。○九年題准。浙江省每囚一名。日給米一升。錢

五文。動支地丁存公銀。○二十五年議准。向例軍流人犯。貧窮無手藝者。初到配所。各犯本身妻室子女。每名給予一年口糧。今僉遣家屬之例停止。有情願攜帶者。沿途口糧。及到配一年口糧。自應止給軍犯本身。不必並及妻室子女。○三十一年議准。除浙江省遞犯口糧。於各屬養廉內捐給外。其湖北湖南甘肅廣東廣西等省軍流發遣及遞解人犯。每名日給米一升。燈油柴薪錢五文。於存公銀內支給。陝西省軍流發遣及遞解人犯。每名日給錢二十文。每行程

五十里為一日。於存公銀內支銷。四川省每名日給米一升。鹽菜銀五分。每行程五十里為一日。於鹽茶存公銀內支銷。雲南省每名日給口糧鹽菜錢十七文。於司庫銅息銀內支銷。貴州省軍流遞解人犯。每名日給米八合。鹽菜銀五釐。於耗羨銀內支銷。四十年議准。各省遞解軍流人犯。沿途多有因循舊例。每日關給口糧米一升。與免罪入伍遣犯減支鹽菜不符。且較之軍營各項兵丁口糧數目更屬過優。自應酌減。所有每日支給米一升之山西等十一省。俱

改為每日以八合三勺支給。○四十四年

諭。向來刑部及各省監獄。凡在禁囚犯。有給銚油之例。甚屬無謂。著傳諭刑部堂官。查明此項銚油。因何給予。必係多年相沿陋例。如禁卒坐監看守。自應酌給銚油。至獄囚則斷不宜予以銚油。著即行妥議具奏。行知各省一體遵照。欽此。遵

旨議定。將刑部監獄例給監犯銚油銀兩。改歸看犯禁卒項下支銷。通行直省各督撫等。轉飭有獄衙門一體遵照。應更正者更正。應裁汰者裁汰。酌定章程報部。嗣據議准。江蘇。江西。浙江。湖北。湖

南陝西四川廣西雲南等九省。每名日給口糧米八合三勺。鹽菜錢五文。看犯禁卒鐙油。均自行捐給。其江西省按察使監看犯禁卒。每夜給鐙油錢八文。直隸河南二省。每名日給口糧米八合三勺。監犯鹽菜暨看犯禁卒鐙油錢五文。奉天山東二省。及

盛京刑部。每名日給口糧米八合三勺。鹽菜錢四文。看犯禁卒鐙油錢一文。山西安徽二省。每名日給口糧米八合三勺。鹽菜錢四文。看犯禁卒鐙油。係自行捐備。貴州廣東二省。每名日給口

糧米八合三勺。監犯鹽菜並看犯禁卒燈油銀五釐。甘肅省。每名日給口糧米八合三勺。鹽菜銀三釐。看犯禁卒燈油銀二釐。福建省。每名日給口糧米八合。鹽菜銀三釐。看犯禁卒燈油銀一釐。各省所需銀米。或動額徵獄田租息銀米。或動存倉米穀。及地丁存公等款內採買散給。按年分款造冊題銷。○四十九年議准。四川省司府二監。每年應需棉衣單褲等項。外結贖贖不敷置辦。於耗羨及存公銀內動支。其各省司府二監人犯。所需棉衣單褲等項。俱於耗羨存



公項下動支。按年造冊報銷。如有請動外結贖及存公銀兩。捐資支給者。亦准其按各省地方情形。分別覈辦。○道光十年議准。熱河承德府並所屬州縣。一切刑錢案內贓罰贓變。及自理贖錢。原由熱河道提解存庫。作為囚衣銀款支用。惟每年應解贓罰贓變未定。而囚衣歲所必需。若指定動款。恐支絀不齊。應歸入內結雜款錢糧之內。統作經費。○光緒三年奏准。山西省城建立候審公所。自本年八月初一日起。除各案原告及被控錢債書役門丁等。不必體恤。

外其餘牽連人證均准發所收養候質。分別男女異號而居。日給米麪鹽菜。更給席之外各予煤炭。並予醫藥。遴委心地慈祥才優守潔之正佐各員經理其事。遵照部議。以每月有無病斃及所斃之多寡。定委員之功過。如能勤慎將事。終年無誤者。記功之外。給予委署一次。以示鼓勵。一切候審人證。日需飯食。並委員水火夫役人等新工銀兩。均在藩庫生息公用項下。按月支給。月底覈實造報。○又奏准。山西省城建立候審公所。向在司庫公用生息項下動支。現在

每年動用無餘。自應另籌專款。以期經久。查有司庫台山公用生息銀一千七百餘兩。原係奏備台山歲修之用。此項銀兩。除歲修外尚有餘積存儲司庫。遇地方一切公事。由藩司查明詳請動用。今候審公所經費。每歲約需銀一千兩上下。即將台山公用生息。每歲收銀一千七百餘兩。通融動用。○八年奏准順天府衙門建立候質公所。所交看守人證。每日以六十名計之。月需米十五石。每季共需四十五石。自本年秋季起。每季首俵以粳米五十石之數咨發。統俟

年終報銷。由戶部劄倉印給米票。○又奏准陝西省建立候審公所。現籌措銀七千兩。以一千兩作為修建公所工料之需。餘銀六千兩。交縣發商生息。長年取息一分銀六百兩。以為候審公所一切經費。該項係在司庫公捐。及生息項下挪湊支給。並未動用正雜錢糧。

撫難夷。○乾隆二年

諭。今年夏秋間。有小琉球國裝載粟米棉花船二隻。遭值颶風。斷桅折柁。飄至浙江定海象山地方。隨經該省督撫查明人數。資給衣糧。將所存貨物。一一交還。

其船及器具修整完固。咨送閩省附伴歸國。朕思沿海地方。常有外國夷船遭風飄至境內者。朕胞與為懷。內外並無歧視。外邦民人。既到中華。豈可令一夫失所。嗣後如有似此被風飄泊之船。著該督撫督率有司加意撫恤。動用存公銀賞給衣糧。修理舟楫。並將貨物給還。遣歸本國。以示朕懷柔遠人之至意。將此永著為例。○嘉慶二十三年議准。朝鮮國遭風難夷。除照例護送歸國外。仍由禮部移知戶部。行令通州中倉監督山海關管關廳及沿途地方官。照數給予口糧草束。以示軫恤。○又議定。朝

鮮國遭風難夷。漂入內地。禮部奏派六品官一員。護送至該國交界地方。難夷及護送官。每人均日支粟米一倉升。劄行通州中倉監督給發口糧七日。至山海關。令管關廳給發口糧八日。該國遣使護送內地遭風民人。事竣回國。齎咨官每員日支粳米一倉升。小通事及從人。每名日支粟米一倉升。由通州中倉監督。山海關管關廳照前按日給發。口糧馬草。由經過州縣給發。每員名日給米八合一勺。官支粳米。餘支粟米。每馬一匹。日支七斤重草一束。

救災○康熙二十七年覆准。雲南省鶴慶劍川二處地震。該撫委官賑濟。壓斃者每名給銀一兩。壓傷者每名給銀五錢。倒壞房屋。每間給銀二兩。被災無棲止者。每名給穀一石。幼者給穀五斗。動支常平積穀○五十七年

諭索倫人等於圍場效力甚屬年久。現在亦有出兵之人。聞被水災。朕心深為憫惻。著將戶部備用銀內動支萬兩。前往散給。將被災之人逐一查明。無房屋者即賞給房屋。無衣服者即賞給衣服。務令均霑實惠。以副朕軫恤至意。○五十九年覆准。臺灣颶風大作。

傷損人民。倒塌房屋。照散賑例散給。其船壞淹溺兵丁。照出征病故綠旗兵丁之例賞給。○雍正元年。覆准。河南省中牟縣黃水漫溢。武陟縣沁黃並漲。衝塌房屋貧民共三千五百八戶。動支地丁銀。每戶給銀一兩。○六年。覆准。福建省永定縣五月大雨。山水驟發。傍溪房屋人口被衝。每大口給銀一兩。小口給銀五錢。倒塌房屋。住房每間給銀一錢。浮店每間給銀四分五釐。

○八年

諭。昨午地震。兵民房屋牆垣。必有顛塌者。其內外城居



民。每城令滿漢御史各一人分詢民間房舍倒塌。牆垣傾頽者。作速分別具奏。朕將加恩賞給。欽此。遵

旨查勘。給中城銀七百八十四兩有奇。東城三千五百十六兩。南城八百六十五兩。西城萬二千三百六十兩有奇。北城萬三千六百七十兩有奇。均發

內帑賞給。○乾隆二年題准。地方儻遇水災驟至。督撫聞報。一面題報。一面委官量撥存公銀。會同地方官確查被災之家。果係房屋衝塌。無力修整。並房屋雖存。實係飢寒切身者。均酌量賑

恤安頓。如遇冰雹颶風等災。其間果有極貧之民。亦准其一例賑恤。○又

諭。前因畿輔地方被水。特命侍衛等前往賑恤居民。其各營汛防被水兵丁。據議稱兵丁領受餉銀。其房屋亦係官給。不應在賑恤之內。朕思兵民均屬一體。此番被水。室廬坍塌。妻子無依。情殊可憫。應每名量行賞銀二三兩。為目前養贍。以待官蓋營房。著即傳諭賑恤官員等。酌量輕重。作速妥協辦理。欽此。遵

旨議准。將營兵被水至重人口多者。賞銀三兩。被水稍重人口無多者。賞銀二兩。被水至輕人口少者。

賞銀一兩。○三年

諭各省督撫身任地方。皆有父母斯民之責。於所屬州縣水旱災傷。自應速為訪察。加意撫綏。朕前屢經降旨訓示。該督撫等自能仰體朕心。不致玩視民瘼。稽延時日。朕念水旱之災。同宜賑救。而水為尤甚。旱災之成以漸。猶可先事豫籌。水則有驟至陡發之時。田禾浸沒。廬舍漂流。小民資生之策。蕩然遽盡。待命旦夕。尤當速為拯救。庶克安全。不致流移失所。現在成例分別極貧次貧。其應即行拯救者。原不待部覆。但恐各省辦理不一。或仍有拘泥遺延。致災民不能及

時需惠者。用是再降諭旨。嗣後各該督撫可嚴飭地方官。凡遇猝被水災。迅文申報。督撫即刻委官踏勘。設法拯濟安置。一面辦理。一面奏聞。務使早霑實惠。俾各寧居。以副朕憫念災黎之至意。儻或怠玩濡遲。致傷民命。或有司奉行不力。胥役侵蝕中飽。以及藉名捏飾。浮冒開銷等弊。該督撫照例嚴叅。儻辦理未協。積弊未除。則咎在督撫。將此永著為例。○七年覆

准。江蘇省所屬山陽等二十州縣。夏秋被水衝坍民房十四萬八千四百八十七間。給銀搶修。草房每間給銀四錢五分。瓦房每間給銀七錢。

五分。○又覆准。安徽省所屬懷甯等三十六州縣。被水衝坍民房六萬六千三百八十間。照例分別瓦房草房。按間給予修葺之費。○又覆准。江西省興國甯都瑞金萬安龍泉等縣。夏被水災。淹斃人口。衝倒房屋。每大口給銀一兩五錢。每小口八錢。瓦房每間給銀八錢。草房每間給銀五錢。○八年議准。四川省西昌縣城鄉等處。雨水衝沒民房。瓦房每間給銀二兩。草房每間一兩。牆壁脫落三面者給銀三錢。脫落二面者二錢。脫落一面者一錢。淹斃人口。每口給銀二

兩。○九年覆准。江南省江浦六合等縣水衝民房。瓦房每間給銀七錢五分。草房每間四錢五分。淹斃人口。每口給銀五錢。○十年議准。上下江被災民房。上江瓦房每間給銀四錢。草房三錢。次貧各減一錢。下江瓦房每間給銀七錢五分。草房四錢五分。仍於定例之外。每間各加銀二錢。又淮安所屬阜甯縣水衝民房。草房每間給銀六錢五分外。每間加給三錢。○十一年議准。陝西省通渭縣水衝民屋。每間給銀五錢。淹斃人口。每口給銀二兩。平涼縣水衝民房。每間

給銀一兩。塌損民房。每間給銀五錢。秦州水衝民房。每間給銀一兩。壓斃人口。每口給銀一兩。○十二年議准。江南省崇明縣風潮為災。坍塌民房。除照常例給銀外。每間加給二錢。○又覆准。山東省鄒平等九十州縣衛所。被水衝倒民房。極貧每戶給銀一兩五錢。次貧每戶給銀一兩。再次貧每戶給銀五錢。○十六年

諭。上年江安二省內有偏災之宿州鳳陽泗州長淮宿遷邳州大河海州等處。各該撫業將本年應徵新舊漕糧。題請分別蠲緩。所有此項減船軍丁苦蓋食用

之需。未免拮据。著加恩於定例折給半月之外。再賞給二分以恤丁力。○又

諭。據奏朝邑縣於六月十四五等日河水驟漲。淹及民居。輕重不等。現在察勘分別賑恤等語。朝邑逼近黃河。地本窪下。此次河水漲溢。被災貧民。雖經照例撫恤。但其中有房屋家具糧食盡被淹沒者。家室漂搖。更可憫惻。著該督撫查明此等被災較重之戶。於常例外加恩賞給一月口糧。○十七年題准。湖南省茶陵州及邕縣。於乾隆十六年被水衝倒房舍七百十二間。每間給銀五錢。草房二百六十七間。



每間三錢。淹斃老婦。每口給銀一兩。幼孩每口給銀五錢。二十九年奏准。雲南省江川。通海。甯州。河西。建水等五州縣。去歲十一月內地地震。倒壞房屋。每間賑銀五錢。草房每間賑銀三錢。壓斃人口。每大口給銀一兩五錢。小口給銀五錢。壓傷不論大小口。每口給銀五錢。現存被災各戶。每口賑穀一石。幼者賑穀五斗。折色穀每石折銀五錢。奉

諭。江川等州縣。此次地震。壓損房屋較多。民力未免拮据。著將應行賑恤之項。加倍散給。務俾災黎均霑實

惠。○又

諭。湖南武岡等州縣山水驟發。衝壞田廬。淹損人口。著分別輕重。加意撫恤。○三十年

諭。甘肅地動。壓損房屋人口。朕心深為軫惻。著查明被災情形。分別優恤。○四十年

諭。河南武陟縣被水衝塌草房。著照例賞給修房銀兩。○四十一年議准。地方猝被水災。該管官查倒塌房屋。給予修費。淹斃人畜。分別撫恤。奉天省水衝旗民房屋修費銀。全衝者每間給銀三兩。尚有木料者。每間給銀二兩。有上蓋者。每間給

銀八錢。每二人合給一閒銀兩。又淹斃人口。每口給倉米五石。直隸省水衝民房修費銀。全衝者。瓦房每閒給銀一兩六錢。土草房每閒給銀八錢。尚有木料者。瓦房每閒給銀一兩。土草房每閒給銀五錢。稍有坍塌者。瓦房每閒給銀六錢。土草房每閒給銀三錢。如瓦草房全應移建者。每閒加給地基銀五錢。每戶不得過三閒。又淹斃人口。每大口給銀二兩。每小口給銀一兩。山東省水衝民房。露宿之時。不論極貧次貧。又次貧。按戶先給搭棚銀五錢。驗給修費銀。極貧

每戶一兩五錢。次貧每戶一兩。又次貧每戶五錢。淹斃人口。每大口給銀一兩。每小口給銀五錢。山西省水衝民房修費銀。全坍者瓦房每間給銀一兩二錢。土房每間給銀八錢。半坍者瓦房每間給銀五錢。土房每間給銀四錢。淹斃人口。每大口給銀一兩。每小口給銀五錢。河南省水衝民房修費銀。瓦房每間給銀一兩。草房每間給銀五錢。淹斃人口。每大口給銀一兩。小口給銀五錢。江蘇省水衝民房修費銀。瓦房每間給銀七錢五分。草房每間給銀四錢五分。淹斃

人口。每大口給銀自五錢至八錢為率。每小口給銀自二錢五分至四錢為率。安徽省水衝民房修費銀。極貧之戶。瓦房每間給銀四錢。草房每間給銀三錢。次貧之戶。瓦房每間給銀三錢。草房每間給銀二錢。淹斃人口。每大口給銀一兩。每小口給銀五錢。福建省水衝民房修費銀。瓦房每間給銀五錢。草房瓦披各每間給銀二錢五分。草披每間給銀一錢二分五釐。淹斃人口。每大口給銀一兩。每小口給銀五錢。擊破漂沒民船。大船每隻給銀三兩。中船每隻給銀二

兩。小船每隻給銀一兩。浙江省水衝民房修費銀。樓房每間給銀二兩。瓦平房每間給銀一兩。草房每間給銀五錢。草披每間給銀二錢五分。淹斃人口。每大口給銀二兩。每小口給銀一兩。陝西省水衝民房修費銀。全衝者。凡房每間給銀二兩。草房每間給銀一兩。未全衝者。半給。淹斃人口。每大口給銀二兩。每小口給銀一兩。衝失腳驢。每頭給銀四兩。衝失耕牛。每隻給銀二兩。甘肅省水衝民房修費銀。每間給銀一兩。淹斃人口。每大口給銀二兩。每小口給銀一兩。衝

斃牲畜。每戶給銀五錢。四川省水衝民房修費。銀。衝沒者。瓦房每間給銀二兩。草房每間給銀一兩。坍塌者。瓦房每間給銀五錢。尚存竹木者。每間給銀自一錢至五錢為率。淹斃人口。每大口給銀二兩。小口給銀一兩。廣東省水衝民房修費銀。大瓦房全倒者。每間給銀一兩。半倒者。每間給銀五錢。小瓦房大草房大茅草房全倒者。每間給銀五錢。半倒者。每間給銀二錢五分。小草房小茅草房全倒者。每間給銀二錢五分。半倒者。每間給銀一錢二分五釐。吹揭瓦房。每

間給銀一錢。擊破漂沒民船。大船每隻給銀一兩。小船每隻給銀三錢。淹斃人口。每大口給銀二兩。每小口給銀一兩。壓傷人口。撫恤銀。每口給銀三錢。廣西省水衝民房修費銀。瓦房每間給銀八錢。米五斗。草房每間給銀五錢。米五斗。淹斃人口。每口給銀一兩。衝壞水車。大者每座給銀四錢。中者每座給銀三錢。小者每座給銀二錢。衝壞堰壩。每座給銀自六兩至十兩為率。雲南省水衝民房修費銀。瓦房每間給銀一兩五錢。草房每間給銀一兩。坍塌牆垣。每堵給銀



二錢淹斃人口。每口給銀一兩五錢。貴州省水  
衝民房修費銀。瓦房每間給銀八錢。草房每間  
給銀五錢。淹斃人口。每大口給銀二兩。每小口  
給銀八錢。湖北省水衝民房修費銀。瓦房每間  
給銀五錢。草房每間給銀三錢。淹斃人口。每大  
口給銀一兩。每小口給銀五錢。四十九年

諭鎮江後幫漕船。猝遇暴風。人力難施。以致登時沈溺。  
情殊可憫。所有漂失米石。著加恩寬免。其淹斃人口。  
並著照例賞卹。○又

諭。江西安福南昌九江前後等幫漕船。在湖面夜值雷

雨。風火迅烈。人力難施。以致焚失漕米。燒斃人口。殊堪憫惻。所有被燒船隻。米石等項。著加恩概免賠補。其燒斃淹沒人口。著該部照例賞卹。○又

諭。雲龍州地方。猝被水災。竈戶居民淹浸房屋等項。均著照例加賞。務使各霑實惠。○五十年

諭。據福康安奏。肅州本城於三月初十日酉刻地震。情形尚輕。玉門縣所屬之惠回堡。白楊河等處。亦於初十日同時地震。情形稍重。現已飭藩司。浦霖馳赴該處查勘撫恤等語。玉門遠在關外。本屬瘠土邊氓。今猝被地震。以致倒塌房屋。損傷人口。朕心深為軫念。

該督即飭令該司作速查明。照例妥為撫恤。○五十

一年

諭湖南常德府城因連日大雨。江水暴漲。田畝廬舍猝被淹浸。著該督撫查明淹損田畝衝塌房屋。照例妥為撫恤。毋致失所。○五十三年奏准。臺灣彰化等縣城及村莊民房被賊焚毀。給銀苫蓋草寮。以資棲止。○又

諭。荊州府屬被水較重。綠營兵丁房屋多有淹浸。所有被水兵丁三百二十六名。俱著每名賞給銀四兩。○

五十四年

諭。滇省通海等五州縣。連次地震。情形較重。除查勘先行撫恤外。所有震倒房屋。傷斃人口。著即分別散給銀穀。務須確實妥辦。毋令一夫失所。○又

諭。前據富綱奏通海等五州縣。於五月十四日連次地震。親往查辦。業降旨令該督確實妥辦。照乾隆二十八年江川等處地震之例賑濟。茲據查明城垣官署俱有坍塌。民居並多倒塌。間有傷斃人口之處。共賑銀九千九十餘兩。需穀一萬九千三百五十餘石。各於本處倉存內動支。如有不敷。照例折銀五錢等語。此次通海等處同時地震。情形較重。小民倉猝被災。

殊堪軫憫。若僅每石折銀五錢。為數尚少。恐不敷買食。著再施恩。加倍折給銀一兩。所有已經散給者。如數補給。務使災民均霑實惠。其坍塌房屋。傷斃人口。仍照二十八年之例。妥為撫恤。○又

諭。江西袁州幫旗丁運船二隻。行至黃河大溜。陡遇暴風。浪湧入艙。兼以兩船撞擊。登時散裂。以致淹斃人口。殊為可憫。著加恩照例分別卹賞。○又

諭。蒙陰一縣猝被水患。浸塌民房四百餘間。並淹沒田廬。傷斃人口。殊堪憫惻。前經降旨。令確查撫恤。酌量接濟。今該撫將衝塌房屋。給銀修葺。其各村貧民被

災較重。所請再酌借一月口糧之處。竟當賞給。以示格外體恤。○五十五年

諭永平府河水漲發。城外各鄉水勢漫溢。壓傷人口。著即查明酌給銀兩。以示體恤。○五十六年

諭湖北漢陽江岸。停泊民船失火。延及各船。一時風狂火烈。被燒運船數十隻。淹傷委員及淹斃人口。俱著妥為優卹。此外商民同時淹斃者。亦著查明一體辦理。○五十七年

諭江西九江前幫漕船。在黃河陡遇風暴。人力難施。以致淹斃人口。殊為可憫。所有淹斃水手人等。著照例

優卹。即得生者。亦著加恩賞賚。○又

諭。熱河連次得雨後。山水陡發。沙隄一帶官兵居民房屋。間被衝塌。深堪軫念。著加恩將被水較重之東四旗蒙古協領佐領等官八員。每員各賞三月俸銀。兩月俸米。兵一百六十七名。每名各賞三月錢糧。兩月甲米。被水較輕之正白旗滿洲佐領一員。著賞兩月俸銀。兵三十三名。每名賞兩月錢糧。被水居民大口各賞兩月口糧。小口各賞一月口糧。以資口食。其官兵被衝房屋。交工程處動項修蓋黏補。至居民鋪戶衝塌瓦房。著賞銀四兩。土草房賞銀二兩。交該道府

查明發給。令其自行修蓋。俾得各安棲止。不致稍有拮据。○又

諭江西南豐廣昌二縣。山水驟發。致被淹浸。雖經該撫查明業已照例撫恤。並聲明水勢已退。尚可趕種晚禾。不致成災。但該處民居衝塌較多。且有淹斃人口之事。朕心殊為惻然。所有南豐廣昌二縣應行賞給建蓋民房暨掩埋銀兩。俱著加倍賞給。以示體恤。災黎有加無已至意。○又

諭臺灣地方遠隔重洋。居民猝遭地震。倒壞房屋。壓斃人口。殊堪憫惻。所有給銀撫卹之處。著加倍給予。以



示體恤。○五十八年

諭。江西湖南幫船行至江面。猝遇暴風。船米漂沒。淹斃人口。殊為可憫。所有淹斃水手人等。著照例優卹。○

又

諭。秦甯一帶。因地震坍塌房屋。壓斃人口。殊堪憫惻。著照上年打箭鑪地方撫卹之例。亦著加倍賞給。○又諭。回空運船在大江停泊。猝遇狂風。漂沒多船。殊屬可憫。所有淹斃舵手。著加恩照例賞卹。其淹斃家口。並著加倍卹賞。○又

諭。河內武陟二縣連年積歉之區。今秋禾稈被水淹。所

有各該村莊坍塌草房。每間著賞給修費銀五錢。無力貧民賞給一月口糧。○五十九年

諭。沔陽等處猝被水淹。居民房屋浸損。人口亦有淹斃。情殊可憫。著加恩照例加兩倍賞卹。○又

諭。湖南零陵祁陽二縣猝被水淹。以致坍塌房屋。貧民無所棲止。殊為可憫。著照成例分別加兩倍賞給。俾得各安棲止。毋致一夫失所。○又

諭。豫省衛輝等屬。因丹沁衛河水勢盛漲。所有坍塌瓦土房間。俱著按例加兩倍給予修費。○又

諭。固關地方山水陡發。淹斃人口。兵丁房屋多有衝損。

情殊可憫。所有坍塌房間。應行給予修費。及被淹人口。卹賞銀兩。並著加恩。按例加兩倍賞給。○又

諭。山西代州之五臺等縣。夏雨稍多。各處山水漲發。淹浸人口。致有損傷。情殊可憫。著即查明該處所有衝塌房屋。淹斃人口。均按例加兩倍給予賞卹銀兩。俾資口食棲止。○又

諭。高要縣因海潮頂阻。被水淹浸。民房衝塌。著加恩。按例加兩倍給予修費。以示軫卹。○嘉慶元年

諭。湖北江陵等縣。江漢同時並漲。民田廬舍多被淹浸。深為憫惻。所有災民淹塌房舍。著即照例分別給予

修費。俾資口食棲止。○又

諭。河南永城縣所屬洪溝河。宣洩黃水。附近村莊。聞有被淹。所有坍塌房屋。著照例給予修費。○二年

諭。陝西興安府地方。因四川達州匪徒闖入境內。居民被焚房屋。瓦房每間給銀五錢。草房每間給銀三錢。

○又

諭。浙江沿海被風各縣坍塌房屋。其無力貧民貧竈。除照例給予修費外。著該撫查明淹斃人口。一體散給埋銀。○四年

諭。漢陽江岸停泊漕船戰船俱被焚毀。而各船商民水

手船戶人等。閒有被燒落水身死。殊為可憫。著該督等查明照例撫卹。○又

諭。福建同安縣因值大雨。山水漲發。漫溢入城。民房多被衝塌。閒有淹斃人口。殊為可憫。著將民房照例給予修費。並賞給埋葬銀兩。○又

諭。永順府猝被山水。民閒房屋閒遭衝塌。並淹斃人口。深堪憫惻。該撫務須妥為經理。實力撫卹。其被衝民房。即照例給予修費。○六年

諭。永定右安各門外民人村莊房屋。因河水陡發。猝被淹浸。無可棲止。著於河岸暫行搭蓋窩棚。使災民眷

口均有住處。務當悉心妥辦。不致失所。○又

諭。西路長新店。盧溝橋等處。被災較重。居民著搭蓋棚廠。用資棲止。○又

諭。前因近京一帶。被水災黎。禦冬無具。曾諭令置購棉衣。以備賞給。經各當商等呈交棉衣六萬二千件。著賞給銀一萬二千四百兩。按各商交出多寡。均勻給發。○又

諭。本年近畿一帶。被水較重。實非尋常偏災可比。當經降旨。截留漕米六十萬石。動撥帑銀一百五十萬兩。並以工代賑。為費亦不下百餘萬。現屆開放大賑之

期。氣候已屬嚴凝。念窮黎等無衣禦寒。特發給帑銀。置購棉衣數萬件。交順天府五城分地。同日散給。著派文武大員同該城御史監放分賞。此實朕軫念災黎。恩施格外。在貧民等得有絮纊過冬。藉資全活。惟當安靜領賑度日。轉瞬春融。務當各謀生業。毋以特恩為可屢邀。勉為良善。以副朕子惠困窮之意。○七

年

諭。此次朕恭謁

裕陵。所有鑾輅經過之通州三河薊州遵化四州縣。雖時交春令。氣候尚寒。恐貧民猶有衣不蔽體者。著加

恩賞給棉衣二萬件。令順天府送交陳大文轉飭各該地方官。於回鑾後均勻散給。以示朕恩施無已至意。○十一年

諭漳縣

今裁缺

所屬之西南鄉。於三月二十九日至四月

初一日等日。雷雨大作。上游山水陡發。居民不及遷避。以致人口淹斃多名。房屋多有衝塌。情殊可憫。岷州及兩當縣所屬村莊。亦於三月十七日二十九等日暴雨傾注。均有衝斃人口。損壞地畝處所。現據照例賑恤外。所有該州縣衝塌房屋。並當官給修費。若仍於頂衝處所修建。究非日久安居之計。應飭令地



方官曉諭居民。即於就近處所另擇地勢。及時建蓋以資棲止。○十二年

諭臺灣商哨各船。因颶風大作。換班兵丁等多被淹溺。情殊可憫。所有萬字六號哨船被淹之把總外委及兵丁舵手人等。俱著加恩照例卹賞。又遞送文報修駕哨船兵丁。及遣護小船附載匠夫人等同時覆溺。均著加恩分別卹賞。○又

諭綏定城內居民。及麻柳場村寨。猝被叛賊蹂躪。房舍資財悉遭焚掠。情殊可憫。所有被難男婦大小名口。均著加恩給賑三月。每日每人給予米一升。燒毀房

間。瓦房每間給予修費銀一兩。草房每間給予修費銀五錢。所需糧米。即於達縣存倉穀石內動碾散放。修屋銀兩。於存庫公項內動用支發。其達縣城內及麻柳場被難民人各名下應徵本年錢糧。並著按戶查明。加恩全行豁免。○十五年

諭吉林地方自六月以來。陰雨連綿。於七月初一日夜間。江水陡發。漫溢兩岸。沿江低窪處所。田畝房屋及義倉馬廠。間被淹浸。其松花江下游居民。於黑夜猝不及防。亦有淹斃人口之事。著即於庫存備公項下支銀一千兩。為搭蓋棚廠散給饘餅之需。其旗民口

糧折色俱著統歸撫恤案內報銷。所有成災分數。迅速查明分別蠲緩。由驛馳奏。候朕恩旨。○二十年

諭。山西省運城等處。同時地震。文武廟宇衙署倉庫城垣監獄並民房間。均有坍塌。壓斃人口至數千名之多。實堪憫惻。著即迅速查明。比照向例。蠲緩賑恤。務令實惠及民。其掩埋人口。修理房間。並受傷人口。酌給醫藥。因傷致斃者。仍給掩埋銀兩。露處貧民。煮粥接濟等情。俱著妥速辦理。○又

諭。那彥寶即在山西藩庫於捐監項下動支銀五萬兩。帶赴蒲解地震各州縣。將被災民人確細查勘。酌量

給賞。○二十一年。給河南省汲新鄉淇輝獲嘉濬六縣災民房屋修費。○二十四年

諭。古北口地方。本年六月間。因雨後山水陡發。潮河長水丈餘。密雲灤平二縣。除官房不計外。被衝兵民瓦草房一千七百三十八間。漂沒兵民男婦大小二百一十一名口。被水現存男婦大小二千九百一十二名口。此次該處被水情形較重。著加恩照乾隆四十九年之例。加倍撫恤。所有兵民被衝房間。瓦房每間給銀二兩。草房每間給銀一兩。被衝倒塌尚存料物者。減半散給。其淹斃人口。大口給銀二兩。小口給銀

一兩。被水男婦大口給銀一兩。小口給銀五錢。即於藩庫動支。迅速給放。事竣造冊報銷。○又

諭永定河漫水下注。大興宛平兩縣所屬求賢高米店等村。同時被淹。村民男婦盡赴南苑土堆避水逃生。情殊可憫。亟應設法撫恤。現已有旨由廣儲司撥銀一萬兩。著韓鼎晉奎耀汪如淵即帶銀前赴散給口食。或折給銀錢。並於附近高阜處所搭蓋棚廠。曉諭現在南苑避水貧民。以苑內係屬禁地。今已搭有棚廠。可供伊等棲止。令其遷移就食。務各盡心撫恤。毋令失所。○又給河南省蘭陽儀封杞祥符陳留通許

尉氏。中年。榮澤。睢。柘城。鹿邑。淮甯。西華。太康。獲  
嘉。新鄉。延津。封邱。考城。武陟。原武。陽武。鄭。扶溝。  
甯陵。汲。輝。滑。濬。淇。洛陽。偃師。鞏。三十四州縣被  
水災。民房屋修費。道光元年。給河南省葉縣  
被水災。民衝塌房屋修費。○又給安徽省宿靈  
壁。泗。鳳陽。四州縣。及屯坐各衛被水軍民房屋  
修費。○三年。給湖北省江陵。監利。廣濟。三縣。及  
屯坐各衛被水軍民房屋修費。○十年。以直隸  
省磁。邯鄲。成安。三州縣地震災重。命發常平義  
倉穀。設廠煮賑三月。○又以河南省安陽。臨漳。

武安三縣地震災重。發常平義倉穀石。設廠煮賑。十九年。賑雲南省浪穹。鄧川。二州縣地震災民。又

諭臺灣嘉義縣地方。於五月十七十八等日地震。城垣衙署不無坍塌。並塌倒民房。傷斃人口。情殊可憫。著桂良等派委明幹大員。迅速前往查辦撫卹。給予修費銀兩。其委員所帶司庫撥銀五千兩。如有不敷。即由該道庫籌款撥給。務令實惠均霑。該郡孤懸海外。當此被災之際。尤宜督飭地方文武員弁加意巡察。如有匪徒乘閒作姦。或造謠煽惑。搶竊擾害者。立即

嚴拏懲辦。毋稍疏縱。○二十五年

諭。本年正月。臺灣府彰化縣地方陡遭地震。坍塌民房四千二百餘戶。壓斃男婦三百八十餘名口。此外被壓受傷者為數尚多。自應亟籌撫恤。現已由該督等飭司在藩庫籌撥銀五千兩。委員解往。會同該縣查勘覈實散給。仍著該督等飭臺灣道府親赴被災處所。逐加履勘。妥為撫恤。○又

諭。臺灣府境。於六月初旬大雨連宵。颶風間作。臺灣等縣海口。淹斃居民三千餘人。殊堪憫惻。著劉韻珂派員詳細查明被災輕重。妥速經理。所請動用倉穀銀



雨。是否足敷賑濟。務使海濱窮民。不致一夫失所。○

三十年

諭徐澤醇奏西昌地方地震。委員前往撫恤一摺。並酌帶銀兩接濟等語。四川西昌縣城內。於八月初七日地震逾時。衙署監獄倉庫倒塌。軍民壓斃甚多。並有教授曾習傳教諭滕昂中。均被壓傷殞命。實堪憫惻。著該督迅委賢員前往。詳加查勘。妥為撫恤。毋使一夫失所。所需銀兩。著即在於捐備經費項下動支。以資接濟。○咸豐二年。給陝西省興安府被水災民一月口糧。並坍塌房屋修費。○三年。給廣東省南

海三水曲江。海陽豐順大埔澄海高要高明東莞香山樂昌英德清遠四會饒平歸善博羅封川連州陽山。二十一州縣被水災。民房屋修費。

○同治九年

諭。吳崇奏稱巴塘地震。籌款撫恤各等語。本年三月間。四川巴塘一帶。地震火發。壓毀人民房屋。該處遭此天災。殊堪憫惻。吳崇業已籌動款項。派員前往賑恤。即著妥為安撫。毋令失所。○又

諭。本年六七月間。熱河郡銜連次大雨。被銜民房六百餘間。淹斃大小男婦四十六名口。其獅子溝等處兵

民房屋亦多被衝。該民人等疊被水災。蕩析離居。情殊可憫。即著直隸總督熱河都統一面督飭地方官設法堵禦。一面查明被災各戶口。加意撫恤。毋令一夫失所。○光緒十年

諭廣東順德縣屬。本年四月初間。陡起颶風。兼以暴雨。傷斃居民九十餘名口。房宇倒塌多間。並有覆溺船隻情事。著該督撫督飭地方官確切查明。妥籌撫卹。毋任失所。

欽定大清會典事例卷二百七十一

戶部

蠲恤賑飢一

賑飢○順治二年題准八旗潦地每六畝給米二石○又題准口外八旗蒙古地畝被災按飢民名口折給米銀許其沿邊糴米毋令進口○又題准八旗游牧地方被災人口每月給米一斗在張家口者給米古北口者給銀○又題准王貝勒貝子公等府屬人役潦地賑米照例支給其投充人帶來地不准給○五年題准直省

駐防官應給漕地米。所留家口在京支給。隨帶家口在駐所支給。○六年定。八旗每歲倚恃賑給。不務農桑。嗣後停其踏勘。如遇荒歲。王以下食俸官員以上。每歲照俸米倍給。○又定。地方被災。督撫即詳查頃畝分數具奏。○八年覆准。山左江浙等省水災。亟需賑濟。以倉穀賑窮民。以學租賑貧士。○十年題准。賑恤旱潦地畝。自王等府屬佐領以下。至所屬旗人。令該旗都統確查口數。七歲以上為一口。六歲以下。四歲以上為半口。不得以投充及傭雇人充數。○又題

准。八旗貧人。滿洲蒙古每佐領下給布六十疋。  
棉六百斤。米百石。漢軍每佐領下給布三十疋。  
棉三百斤。米五十石。○十一年覆准。八旗潦地。  
令即賑給到通漕米。滿洲蒙古每佐領下給倉  
米二百石。漢軍每佐領下給倉米百石。不論有  
無俸糧。該旗都統酌量散給。○又覆准。八旗旱  
地。每六畝給米二斛。本折各半。折色照時價支  
給。○又覆准。看守

南苑海戶災地。每六畝給米一斛。○又奉

旨發戶禮兵工四部庫儲銀十六萬兩。並

內帑銀八萬兩。分賑直隸省各府飢民。○十三年題准。八旗滿洲蒙古。每佐領給米三百石。漢軍每佐領給米百石。由該佐領領催親驗貧戶給發。其官員家人充兵者不給。○又題准。八旗被災地畝。每六畝給米一斛。○又奉

旨發內帑銀三萬兩。賑濟直隸飢民。○十四年奉

旨發內帑銀十萬兩。分賞八旗兵丁。及賑濟直隸飢民。

○康熙元年覆准。八旗被水災地。每六畝給米二斛。蝗雹災地。每六畝給米一斛。○三年覆准賑給八旗災地米。京通各倉挨給。駐防在外者

行文該地方官支給。○九年。

特遣部院堂官往勘淮揚水災。以鳳陽倉米麥及捐輸等各項米穀儘數賑給。如仍不敷。即動正糧接濟。○十年。

特遣部院堂官會同江南督撫。截留漕米並鳳徐各倉米賑濟淮揚災民。每名給米五斗。六歲以上十歲以下給半。各處同日散給。以杜重冒之弊。○又題准江南省淮揚府州縣分設米廠散給飢民。每人日給米一升。三日一放。部差司官每府一人。協同地方官親驗給放。○十一年覆准八



旗旱災地。每六畝給米二斛。本折各半。其折色照時價支給。○二十五年。

特遣大臣往鳳陽徐州等處發鳳陽倉銀米。並動支附近州縣正項錢糧賑濟。○二十八年。

諭賑濟飢民。關係緊要。著撥戶部庫銀三十萬兩。解交直隸巡撫速行賑濟。○三十年。

諭近因西安等處災荒。撥正項錢糧賑濟。著遣部院堂官一人前往。親行驗給。務使飢民均霑實惠。○又議准。陝西省西安鳳翔等府被災。每大口日給米三合。小口日給米一合五勺。照時價折銀散給。

○又覆准陝西省西安府屬被災二十四州縣衛所鳳翔府屬被災三縣撥發山西省銀二十萬兩解赴陝西賑濟大口日給米三合小口一合五勺照時價折銀給發至次年四月終停止○又覆准直隸省被災井陘等十四州縣將積穀賑濟大口日給米四合小口日給二合○三十三年直隸省霸州文安等十州縣被災將各州縣現儲備賑米糧委道員按日給發大口日給米三合小口日給米一合五勺自二月初一日起至四月終止○三十六年

諭直省被災地方著差戶部賢能司官一人會同該撫等逐一親行確勘具奏○三十七年

諭山東濟兗東三府屬比歲不登米價騰貴令保舉賢能司官二人前往會同該撫一面賑濟一面奏聞○四十年覆准甘肅省河州所屬土司旱災照內地每大口月給米一倉斗小口月給五倉升○四十二年江南省亳州等州縣衛賑濟飢民大口每名日給米五合小口日給二合○又議准山東省賑濟飢民差戶部賢能司官馳驛速往截留漕運尾船米五十萬石交與山東地方官

並委八旗官員各支庫銀三千兩前往山東會同地方官賑濟飢民。○又

諭賑濟山東飢民事關緊要應分為三路每路差大臣一人與先差往司官一同往返巡查於事有益截留漕糧亦屬緊要漕運總督現今無事著作速前來親看截留其賑濟飢民官員所領雖係公項若勉力自效有益於民事竣同時一併議敘。○四十三年覆准湖廣省監利縣被災將常平倉穀每大口日給穀一升小口日給六合自十一月起至次年二月止。○四十六年

諭江南地方。今年自夏入秋。雨澤愆期。該督撫先後奏

至。因念小民久未被災。驟罹荒旱。所關甚鉅。隨命九卿等詳議應行事宜。業經飭令停徵。並發倉穀賑濟。顧倉穀數少。未足徧給。惟各州縣截留漕米。可以實惠及民。目下時已屆冬。總漕無事。著會同總督巡撫親往各州縣被災地方。備加查勘。將本年所徵漕糧。每州縣或留八九萬石。或留十萬石。酌量足支賑給之數。分別多寡。存留支散。及今漕米尚未開兌。截現收之糧。以濟待哺之衆。實於民生大有裨益。此朕殷殷懷保赤子軫念如傷之至意。戶部即移文該督撫

等實心奉行。仍開具賑濟實數奏聞。○四十七年覆准。江南省淮徐揚三府屬水災。倉無存穀。將司庫四十七年截留平糶銀。動支十萬兩賑給。大口月給銀三錢。小口月給一錢五分。○四十九年議准。福建省泉州漳州地方被旱。將今冬應運鎮江漕糧截留十萬石。運至狼山。松江湖州漕糧各截留十萬石。運至乍浦。令福建總督選賢能總兵官二人。親帶大小戰船。至狼山乍浦交割。運至漳泉等處散給。○五十三年覆准。陝西甘肅二省。去歲薄收。於附近存儲糧內撥賑。

自二月起至六月止。每大口日給米三合。小口日給二合。○五十四年議准遣大臣一人巡查甘肅省被災地方。銀米兼行賑濟。○五十九年議准撥戶部庫銀五十萬兩。委司官運送西安延安蘭州。分作三路散賑。並將陝西省各州縣衛所廳常平倉糧六十九萬二千石有奇。甘肅省各州縣衛所廳常平倉糧六十七萬二千石就近酌量散給。除歉收地方外。如有應行散給之處。一面題報。一面會同散給。再旗民有情願效力人員。許自備銀米赴部具呈。將職名送散。

賑官處候效力事竣。照銀米數之多寡。覈明議敘。○六十年

諭。今春雨澤甚少。備荒要緊。著發帑銀五十萬兩。差大臣往山陝地方買米賑濟。○六十一年。

特遣大臣賑濟直隸省贊皇等處四十二州縣飢民。並發米各州縣煮粥賑濟。○雍正元年。覆准山東省連年荒旱。動用庫銀。委官會同該地方官按名散給。賑濟三月。鄰省就近覓食窮民。亦一例散賑。○又覆准浙江省富陽等縣衛被旱乏食飢民。按口煮賑。至來年麥熟停止。○又議准直



隸河南二省。各遣大臣一人。會同該撫將乏食窮黎。速動常平倉穀。查明戶口賑濟。如常平倉穀不敷。將分儲監穀及截留漕米賑濟。其耕種無資衣食匱乏者。酌量資給。至攜家覓食不能回籍者。令直隸山東河南巡撫查明。加意撫綏。招輯復業。仍將賑濟大小戶口米穀數目造冊報部查覈。如有不肖官員侵蝕肥己。並遲延遺漏者。遣往大臣指名題參。○三年

諭今歲直隸地方被水。小民乏食。朕軫念維殷。已截漕發倉多方賑恤。但恐停賑之後。正值東作之時。農民

謀食無策。著再加賑一月。如從前所發之米。不足賑  
糶者。確查奏請。增發米糧。○又覆准。江南省睢甯宿  
遷二縣水災。動支積穀。自十月初一日為始。煮  
粥散賑五月。○又覆准。直隸省霸州等七十二  
州縣廳所。秋禾被水。散賑三月。大興等四縣。雖  
勘不成災。小民被水乏食。亦量賑一月。○又奏  
准。兩淮浙江鹽義倉米穀。遇歉歲應需賑濟者。  
一面題請。一面即於倉儲內照數撥運。○四年  
覆准。安徽省無為望江等州縣被災窮民。寒冬  
乏食。煮賑五月。其應賑米穀。於鄰近州縣積穀。

內撥給。○五年。

特遣大臣御史分往直隸省被災之玉田等二十三州縣逐戶計口悉心勘查發帑散賑。○六年覆准監賑各官遵例減從無擾經承造冊紙筆飯銀之費令各州縣量給。○又議准地方被災督撫等嚴飭各屬親勘填冊按戶給賑毋得假手胥役里甲徒滋侵蝕。○又議准凡拯濟飢民近城之地仍設粥廠其遠在四鄉於二十里之內各設米廠一所照煮賑米數按口一月一領。○七年議准遇災賑濟之後即將賑過銀米數目戶

口姓名月日刊刻告示通行曉諭以杜吏胥中飽。○八年覆准山東省被災動穀散賑大口月給穀三斗小口月給一斗五升各給三月。○又覆准甘肅省西甯府夏旱賑濟大口日給粟米六合小口日給三合。○又奏准北河水勢漫溢直隸省順德廣平大名河間四府所屬州縣被淹。

特遣侍郎副都統科道翰林等前往分為四路每路各於戶部領帑銀二萬兩查勘賑濟若有動用倉穀之處即將本地倉穀動用具奏。○九年江南

省邳州等處被水賑濟三月。○十一年

諭上年江南沿海被水地方。如常熟等二十三州縣。並續報之華亭等六縣。該督撫等已遵旨撫綏賑恤。定議大賑三次。每次以一月為期。料寒冬初春以來。窮民存養有資。不致失所矣。朕念二三月間。正青黃不接之時。尚須籌畫接濟。資其力作。庶可無誤春耕。著再加賑四十日。以昭格外之恩。其有從前遺漏貧民。並先可餬口而目下力不能支者。亦著查明增入補賑之內。再被災之鹽場竈戶。亦照貧民例加賑一月。

○乾隆元年

諭地方遇有水旱之事。凡查勘戶口。造具冊籍。頭緒繁多。勢不得不經由胥役里保之手。其所需飯食舟車紙張等費。朕聞竟有派累民間。並且有取給於被災之戶口者。若遇公明之有司。尚知稽查禁約。至昏愎庸懦者。則置若罔聞。益滋閭閻之擾矣。嗣後直省州縣。儻遇查勘水旱等事。凡飯食盤費及造冊紙張各費。皆酌量動用存公銀。毋許絲毫派累地方。若州縣官不能詳查嚴禁。以致胥役里保仍蹈故轍舞弊蠹民者。著該督撫立即題參。從重議處。○又議准被災各屬飢民。咸使得所。惟貧寒士子。不在齊民賑

恤之列。令即報明該教官造冊轉送地方官。按其家口量加撫恤。並飭教職不得徇情詭冒。致啟弊竇。○二年覆准。州縣散賑。假手書役。米糧多雜沙土。斗斛不能足數。皆由有司漫不經心之故。令該管上司查出。嚴叅議處。○三年

諭各省學田銀糧。原為給散各學廩生貧生之用。但為數無多。地方偶遇歉年。貧生不能自給。往往不免飢餓。深可憫念。朕思士子身列膠庠。自不便令有司與貧民一例散賑。嗣後凡遇地方賑貸之時。著該督撫學政飭令教官。將貧生等名籍開送地方官覈實。詳

報視人數多寡。即於存公項內量發銀米。移交本學  
教官。均勻散給。資其饘粥。如教官開報不實。給散不  
均。及為吏胥中飽者。交督撫學政稽查。即以不職叅  
治。至各省學租。務須通融散給極貧次貧生員。俾需  
實惠。○又議准。辦賑各官。如果有實心實力。潔己愛  
民。使被災黎庶不致失所者。督撫保題。撫綏得  
宜。辦事妥協者。督撫分別題請議敘。其有不實  
力奉行。釐剔弊端。致小民不克均霑實惠者。督  
撫題叅。至若私徵勒派。扣剋侵肥。應據實指叅  
計贓科罪。不得概以限內完贓減免。其應追銀



兩著落賠補。○又覆准甘肅省地處邊隅。從前辦理軍務。需糧浩繁。倉儲未能即裕。儻一時偶被偏災。倉糧不敷。以及鄰邑寫遠。勢難接應。應以銀折給者。行令該督撫臨時酌量時價。奏請辦理。○又議准直省州縣如遇歉歲賑濟。倉穀不敷動支。該督撫酌量情形。准其銀穀兼賑。穀六銀四。事竣題銷。○四年

諭上年江南地方收成歉薄。民食維艱。朕宵旰焦勞。多方籌畫。惟恐一夫不獲其所。據部臣與該督定議賑濟之例。極貧戶口賑四月。次貧者賑三月。又次貧者

賑兩月。皆以本年二月為止。朕思三四月間。正青黃不接之際。在官倉雖有平糶之米。而無力窮民。仍苦糶買無資。難以餬口。良可軫念。下江地方。著將極貧之民。加賑一月。上江去歲歉收。較下江為甚。著將被災五分以上之州縣。加賑極貧次貧者二月。被災四分以下之州縣。加賑極貧者一月。該部可即行文該督撫豫先籌辦米穀。並飭有司實力奉行。俾閭閻均沾實惠。○又覆准直隸省被災地方。於定議賑恤之外。將災重之地。各戶加賑一月。災輕之地。老弱貧民。加賑一月。○又覆准直隸省天津河閒文

安靜海大城。雄縣積水未涸之地。內有將來易涸之一百十四村莊。加賑一月。其深窪難涸之一百三十二村莊。加賑兩月。○又覆准。賑災之時。飭令地方官。豫將被災分數。及賑恤事宜。先行宣示。俾愚民洞悉規條。如有聚眾囂陵情弊。督撫確訪。果係有司玩視民瘼。即行叅劾。若姦民藉端要挾。以及縱容婦女生事。即按律分別究擬。毋得遽揭屬官。致長刁風。○五年覆准。安徽省泗亭宿三州。靈璧。虹阜。陽。潁。上。蒙。城。各縣。極貧次貧。及又次貧災民。加賑一月。○又議准。

各省賑濟米數。每名日支三四合。或至七八合不等。其間數目參差。現無成規。嗣後大口日給米五合。小口日給二合五勺。多少適中。著為定例。○又議准。凡遇年歲災歉。游手貧民。與力田之民。一例子賑。○六年覆准。江南省江浦六合海州。沛陽極貧災民。加賑兩月。次貧災民。加賑一月。清河。桃源。安東。銅山。沛縣。宿遷。極貧災民。加賑兩月。○七年

諭。今歲六七月間。江南淮徐揚州一帶。淮黃交漲。水勢漫溢。甚於往時。朕已屢降諭旨。令該督撫等加意撫

綏現又命大臣前往會同辦理。茲據該撫奏稱揚州目下河水日逐增長。民間自中人家。以及極貧下戶。皆流離四散。雖有平糶之官糧。撫恤之公項。亦不能奔走領糶。似此情形。實非尋常被災可比。朕心深為軫惻。該督撫等不得拘於常例。務須多方設法。竭力拯救。使災黎稍可資生。以俟水退。倍加撫綏。俾得安其故業。毋致失所。○又覆准江蘇省山陽阜甯清河桃源安東五縣。當上年夏秋兩次失收之後。今夏麥又被淹。即補種雜糧。秋成尚早。極貧之民。除先行撫恤一月外。應加賑兩月。次貧之民。

普賑一月。極貧從七月至八月。次貧以八月動用常平倉儲。每大口月給米一斗五升。小口七升五合。穀則倍之。淮安大河二衛被災飢軍。坐落州縣。一例分別賑恤。○又覆准江蘇省所屬秋災被水最重之山陽阜甯安東清河桃源銅山沛縣邳州宿遷睢甯海州沭陽十二州縣極貧之民。先撫恤一月。甘泉高郵興化寶應泰州鹽城六州縣。不分極貧次貧。皆先撫恤兩月。極貧自十月起賑四月。次貧自十一月起賑三月。次重之六合江都二縣。極貧自十一月起賑三

月。次貧自十二月起賑兩月。稍輕之江浦豐縣  
碭山贛榆四縣。極貧自十一月起賑兩月。次貧  
自十二月起賑一月。淮安大河揚州徐州四衛  
隨坐落州縣一例撫恤賑濟。○又覆准安徽省  
鳳陽臨淮懷遠定遠宿州虹靈璧鳳臺壽州阜  
陽潁上霍邱亳州蒙城太和泗州盱眙天長五  
河十九州縣。被夏災飢民。於七月撫恤。被秋災  
飢民。於八月撫恤。夏秋連災者。撫恤兩月。被災  
最重之地。極貧之民。撫恤畢。即於九月起賑四  
月。次貧於十月起賑三月。次重之地。極貧於十

一月起賑。二月次貧。於十二月起賑一月。鳳陽衛、鳳陽中衛及長淮、宿州、泗州共五衛皆隨坐落州縣一例撫恤賑濟。○又覆准江蘇省銅山、沛縣、邳州、宿遷、桃源、清河、安東、海州、沭陽等九州縣續罹水災。沛縣近城一帶原報次貧者轉成極貧。應先加賑十月一月。○又

諭江南上下兩江有疊被水災之州縣。朕心深為軫念。已命大臣前往會同該督撫加意撫恤。以蘇民困。又思此等地方百姓於積困之餘。又罹災患。非加恩於常格之外。不足以拯阽危。其最重者著於定例應賑。



月分之外。加展三月。其次者。著於定例。應賑月分之外。加賑兩月。至於災至六分。次貧不賑者。亦賞賑一月。其被災屯衛軍丁。著照坐落州縣一例。加展月分。又無業貧民。乏食生監。各隨所居鄉村。准其照例領賑。其應於何時開賑。該撫卽酌量情形。舉行。務委賢能有司官。殫竭天良。實力撫恤。其下江被災等處。卽著欽差大臣。會同該督撫。照此旨。酌量辦理。務使災民均霑實惠。○又

諭向來外省地方災荒。有司辦理不善。每將應賑人數。有意裁減。以致人多賑少。國家雖沛恩膏。而小民仍

有不免飢餒者。今年江南被水甚重。且當連年災荒之後。更非尋常可比。凡屬應賑災民。務須將大小口數。據實造冊。不得仍踵前弊。致有遺漏。可速傳諭欽差大臣及該督撫加意稽察。轉飭有司實力奉行。○

又

諭江南山陽阜甯安東清河桃源淮安大河等七縣衛。疊被災祲。黎民困苦。自應格外施恩。著將夏災所賑米價。准與秋災一例報銷。每米一斗。折銀一錢二分。○又覆准直隸省磁州等八州縣貧民。於常例外加賑一月。○又議准地方如遇水旱。即行撫

恤先賑一月。再行查明戶口。被災六分者。極貧加賑一月。連撫恤共兩月。被災七八分者。極貧加賑兩月。連撫恤共三月。次貧加賑一月。連撫恤共兩月。被災九分者。極貧加賑三月。連撫恤共四月。次貧加賑兩月。連撫恤共三月。被災十分者。極貧加賑四月。連撫恤共五月。次貧加賑三月。連撫恤共四月。○又議准地方連年積歉。抑或災出非常。將凡屬應行賑恤事宜。該督撫因時因地妥議題明。除偶被偏災。照例賑濟外。其有不能照常辦理者。或將極貧加賑自五六

月至七八月不等。次貧加賑自三四月至五六月不等。○又議准。山西。湖廣。貴州等省。原不分別極貧次貧。山東。陝西等省。止分別極貧次貧。皆按月給賑。惟江南。浙江等省。原分為極貧次貧。又次貧三項。但被災待賑。每至數千戶。分為極貧次貧。易於查驗。至又次貧一項。與次貧相去無幾。不便酌減賑恤。致有偏枯。且逐一查案分析。未免耽延賑期。徒滋胥役煩擾。應止分為極貧次貧。其又次貧。即列於次貧之內。一例辦理。○又議准。各省地土種植。止有一季。夏災即

准照秋災辦理。其種植兩季之地。若夏季後不能復種秋禾。亦即與秋災無異。至冰雹為災。多在夏月。統照夏災辦理。○八年

諭

上年江南淮徐鳳潁等府遭值水災。朕宵旰焦勞。無一時釋於懷抱。特遣大臣會同督撫百計經理。不惜千萬帑金。期登斯民於衽席。頃據陸續奏報。被水之地。漸次涸出。冬閒可以種麥。石林決口亦已堵禦。水勢減落。朕心稍慰。但念兩江受水之地甚廣。其現在已經涸出者。民間努力耕種。自不待言。其沮洳將涸者。開春布種春麥大麥及雜糧之屬。亦可冀望有收。

惟是最窪之地。積水較深。有非人力所能計。日宣洩者。儻春月不能趕種春麥雜糧。而停賑之期已屆。窮民何以為生。朕思慮及此。深為憫惻。著欽差大臣及該督撫將實在不能涸出補種之地。一一查勘。所有飢民口數若干。按其情形。酌定月分。接續賑恤。毋使失所。○又

諭山東今歲偶被偏災。現在開倉賑濟。但積貯未能在充裕。如有倉穀不敷之州縣。勢必銀穀兼賑。向例折銀五錢。作穀一石。按口散給。朕思東省被災之地。穀價必昂。五錢之價。恐有不敷。著加恩每穀一石。於

舊例外再增一錢折給。俾領賑窮民。購買不致艱難。共需實惠。○又奏准江蘇省淮揚徐海等府州。上年被水之地。耕種莫及。麥秋失望。極貧之戶。再加賑閏四月一月。○又覆准江蘇省江浦等二十九州縣衛。上年夏秋大水。撫恤正賑加賑。給被災軍民米共一百五十六萬二千六百三十五石。銀共五百五萬一千五百二十一兩有奇。又沛縣護城隄工衝決。近城一帶貧民賑糧漂沒。共補給過小麥七百四十三石七斗。又賑過貧生米二千八百三十四石。銀四萬三千六百九

十四兩各有奇。○又覆准安徽省鳳陽等二十四州縣衛。上年夏秋大水。撫恤正賑加賑。通共給飢民飢軍暨貧生米八十三萬一千九百八十石九斗。銀二百三十三萬四千四十五兩八錢四分各有奇。又宿州等州縣收養無依貧民米十九石九斗五升。銀一百四兩七錢各有奇。○又覆准山東省陵縣等被災十二州縣。於例賑之外。將成災六七八九分之極貧者。加賑兩月。七八九分之次貧者。加賑一月。○又議准廣西省土司收成分數。一例疏報。如該地方有實



在荒歉必須接濟者。臨時酌量奏明辦理。○九年議准。山東省德州等十三州縣衛被災。賑濟所需米糧。即於截漕內補給。如米不敷用。照每穀一石折銀六錢之例。動項折給。○又議准。江南省海州。贛榆二州縣災民。極貧加賑四十日。次貧加賑三十日。○又覆准。直隸省天津河間。深州。所屬被災較重之貧民。於例賑外。次貧加賑一月。極貧加賑兩月。○十年覆准。浙江省溫安諸暨等縣。積水不能栽種地方。貧民例賑之外。加賑一月。○又覆准。直隸省宣化府屬被災

貧民無論極貧次貧均加賑一月。○又議准山東省濟甯魚臺等七州縣衛被災賑穀不足令於舊例每石折銀五錢之外加增一錢散給。○

十一年議准河南省鄆陵等二十六州縣秋禾被淹成災勘明該州縣被災輕重酌定加賑月分。其永城等八州縣倉穀不敷銀米兼賑令於舊例每石給銀五錢之外加增一錢散給。○又覆准上下兩江地方被災銀米兼賑災輕州縣每米一石折銀一兩其被災較重之上江宿州等六州縣下江邳州等十州縣加賑月分折價

散給每米一石加增二錢。○又議准上下江被災州縣例賑之外將災重之宿州等十三州縣極貧加賑兩月次貧加賑一月被災次重之泗州等八州縣無論極貧次貧均加賑一月。○又覆准直隸省宣化府所屬地方被災貧民於例賑之外又加賑閏三月一月。○又覆准山東省被災較重之壽光等八州縣例賑之外極貧加賑兩月次貧加賑一月。○又覆准江南省鳳陽等九州縣被災十分九分者極貧次貧加賑兩月被災八分以下之極貧次貧均加賑一月。○

十二年

諭山東被災州縣。朕已疊次施恩。加展賑恤月分。即春月青黃不接之時。災黎均得餬口。惟是被災六分之次貧。上年雖薄有收穫。而春來勢漸艱窘。但格於定例。不在加賑之內。不免向隅之苦。著將壽光樂安博興金鄉魚臺汶上濟甯東平郟城等九州縣內被災六分之次貧。加恩給賑一月。以資接濟。○又

諭上年山東被水地方。已於例賑之外。分別加賑。今朕思萊州府屬之平度昌邑濰高密四州縣。被災雖止六七分不等。然當此東作方興。一經停賑。恐災黎或

至失所。著將平度等四州縣。無論極次貧民。再加賑一月。於二月內給發。以資接濟。○又

諭山東蘭山縣。去秋被災。雖止五分。入春以來。尚未得雨。小民艱於粒食。若僅酌借口糧。恐未足以資接濟。著該撫查明實在乏食貧民。加恩賑濟一月。俾耕作有資。毋致失所。○又

諭山東臨清衛。上年被水成災。坐落濟甯魚臺之十三屯。分數較輕。未邀加賑。第念該處連被災傷。當此青黃不接之際。小民餬口艱難。著照濟甯等處之例。極貧加賑兩月。次貧加賑一月。以資接濟。其郟城縣從

前遺漏戶口。著該撫補給一月口糧。以免匱乏。又諭山東東平聊城莘縣東昌衛。上年被水成災。業已加恩賑恤。但目下正值青黃不接之時。民食難免拮据。著將此四州縣衛被災貧民。再加賑一月。俾得餬口有資。又

諭上年山東被水各府州縣衛。屢降諭旨。分別賑恤。朕又思歉收之後。宜加意撫綏。復經降旨。令該撫將被水州縣。於現在賑恤之外。酌量加恩。以資接濟。今據該撫奏稱。安邱諸城二縣。原報被災五分之各村莊。例不加賑。但今春雨水短少。米價昂貴。小民謀食艱

難其餘未報災之各村莊。雖稍有收穫。今經半載有餘。窮乏戶口。未免拮据。請加賑一月等語。安邱諸城二縣。無論已未成災。著加賑一月。俾貧民餬口有資。毋致失所。○又奏准。山東省益都博興高苑安邱諸

城平度昌邑等七州縣。及收併大嵩鼇山二衛。上年秋禾被水成災。今歲二麥復又被旱。民情益增拮据。除上年秋禾並未被水。止係今歲麥禾被旱之村莊。仍照例借貸籽種口糧外。其上年秋禾被水。今歲二麥復被旱災者。實係乏食窮民。按戶計口。賑給一月口糧。俾窮黎資生得

所均霑實惠。○又

諭山東今年被水之齊河等州縣成災加賑。有因倉糧不敷銀穀兼賑者。定例每穀一石折銀五錢。但思東省今年被災。非尋常可比。現在糧價高昂。照例折價。恐不敷購買。所有加賑口糧。著加恩於每石五錢之外。增銀一錢折給。俾窮黎得資接濟。○又議准江南省猝被潮災。最重之崇明。極次貧民。加賑三月。次重之太倉鎮洋。寶山。上海及南匯之浙鹽場。極次貧民。竈戶。均加賑兩月。又次重之常熟昭文。極次貧民。加賑一月。淮北所屬被水成災。雖



較江以南稍次。但係積歉之區。其災重之海州等九州縣內。被災九分十分者。極次貧民。加賑兩月。被災七八分者。極次貧民。加賑一月。兩淮鹽場竈戶。被災十分之莞瀆。九分之板浦徐瀆。中正臨洪興莊。七分之伍佑等場。極次貧民。加賑兩月。六分之新興場。極次貧民。加賑一月。五分之劉莊廟灣場。極次貧民。加賑一月。○又議准。江南省蘇松等屬沿海潮災。銀米兼賑。令於舊例每米一石折銀一兩之外。加增二錢散給。○又

諭山東今年被災州縣已加恩多方賑恤第念來春停賑之後民食未免艱難著將被災最重之東平等二十三州縣衛無論極次貧民概加賑兩月被災次重之齊河等六十州縣衛所極貧加賑兩月次貧加賑一月其鄒平泰安新泰萊蕪蒙陰費堂邑成災原止五分並各災屬內有被災五分貧民及被災六分次貧止撫恤一月口糧例不加賑又被災屬內先被水淹旋經消落之處雖勘不成災與災地毗連收穫究屬歉薄此等貧民歲內尚可支持來春青黃不接恐有乏食之虞或應借給口糧或須加賑一月著該撫

臨時確查情形。酌量分別辦理。再該省被災之處既多。米價必貴。況來春賑借需用浩繁。必米糧充裕。方於民食有裨。著將河南漕糧內粟米。全數截留。並撥運天津北倉。漕米共足二十萬石。以資接濟。其如何截留運往之處。著直隸總督山東巡撫商酌妥協。一面辦理。一面奏聞。○又覆准。山東省齊河等八十五州縣衛所秋禾被水。內滕縣夏津縣又復被雹。凡成災田地貧民。皆先給口糧一月。內成災五分者。來歲春月酌借口糧資生。六分者。極貧加賑一月。七分八分者。極貧加賑兩月。次貧加賑

一月。十分者。極貧加賑四月。次貧加賑三月。大口。日給米五合。小口減半。○又覆准。山東省鄒平等五州縣衛續報被水成災田地貧民。皆先給口糧一月。內被災五分者。來歲春月酌借口糧資生。六分者。極貧加賑一月。七分者。極貧加賑兩月。次貧加賑一月。十分者。極貧加賑四月。次貧加賑三月。○又

諭。山東上年被災州縣頗多。今清蹕巡歷。深用惻然。損上益下。厥有明訓。以休以助。是謂常經。其再加恩。將經過被災州縣。無論極貧次貧。於現賑外。普行加賑。

一月。其不經過處所被災七分以上者。極貧之民。亦加賑一月。以示優恤。○又

諭朕因山東上年被災甚重。日夜焦勞。溝壑流離之慘。曾經目覩。飢溺之懷。切切於心。現今雨澤未降。二麥又已過期。即使得雨。收成亦必歉薄。拯救之方。不可不急為豫備。朕已傳諭該撫。令其熟籌長策。以資民食。因思就近接濟。惟鄰封是賴。與東省連界之直隸河南江蘇安徽等省。今歲雨澤調勻。春花暢茂。麥收均有可望。著各該督撫酌看本省情形。目下二麥雖未登場。而儲蓄亦已有備。即將存倉積貯穀石。作速

動撥。委官運赴東省。以備賑濟之用。俟秋成後再行買補。其運腳准其覈銷。各該督撫等即將撥運實數具摺奏聞。運到之日。東撫一面奏聞。一面照例散給。其民間餘粟。無論米豆雜糧。廣為招集。以便購買。協濟。古稱救荒如救焚拯溺。早一日得一日之濟。各該督撫等其曲體朕懷。共以拯患恤災為急。不可稍存此疆彼界之分。以副朕恫瘝一體至意。○又

諭山東鄒平等二十州縣。本年秋禾被水。現在勘明賑恤。所有銀穀兼賑之處。向例每穀一石折銀五錢。但思各該州縣頻年歉收。糧價昂貴。並或輓運維艱。折

價不敷買食。未免拮据。著加恩每石增給銀一錢。俾災黎得資餬口。○是年。

特遣大臣科道前往山東體察被水州縣賑濟情形。籌畫撫恤事宜。以安災民。○又奏准上年東省被災奉

旨截留山東本省河南漕糧。並撥運奉天及天津北倉米受撥州縣附近運河者少。輓運回倉。多由陸路。約需銀十數萬兩。上年秋災錢糧蠲緩。本年普免錢糧。司庫現無存公耗羨。即於蘇州漕項銀內撥協銀二十二萬兩。河南地丁等銀內撥

協銀三萬兩。解赴東省。以資運米腳價之用。○  
又覆准。山東省鄒平等九十州縣衛所。乾隆十  
二年秋禾被水。賑濟飢民。共穀四十四萬七千  
六百八十二石八斗。米五十九萬八千六百十  
一石二斗。銀一百七十九萬三千六百四十九  
兩八錢各有奇。又賑濟老弱殘病貧民銀七萬  
八百七十四兩六錢八分。○又奏准。凡坐落被  
災地方之營分。除兵丁本身及家屬在三口以  
內者。不准入賑外。其餘家口。俱各就被災處所。  
分別給賑。○十六年



諭據兩江總督奏稱。上下兩江。去年被水成災最重之  
邳宿海等州。靈壁虹五河宿遷睢甯沭陽等縣。次重  
之壽州及鳳陽臨淮懷遠鳳臺霍邱清河桃源安東  
等縣。三冬已普霑存濟。而冬末春初。賑期已畢。青黃  
不接。民力猶恐難支等語。著再加恩。將被災最重之  
州縣。極貧加賑三月。次貧加賑兩月。次重之州縣。無  
論極貧次貧。均加賑兩月。其貧生飢軍等。隨所在地  
方。一例賑給。○又

諭直隸州縣內上年被災之處。當諭該督照例加意撫  
恤。復經降旨。將十二月內應止賑各戶。加恩展賑一

月。貧民雖不致失所。但今東作方興。被災貧民。未免仍屬拮据。朕巡行畿甸。軫念維殷。著再加恩。將被災七八分之極貧。九十分之極次貧民。各加賑兩月。被災六分之極貧。七八分之次貧。各加賑一月。○又

諭

上年東省雖獲有秋。而蘭山等七州縣偶被偏災。加

恩軫恤。民食固不致缺乏。但農事方興。麥秋尚早。清蹕所經。見蘭山郟城二縣民氣似遜他處。深為軫念。著將蘭山郟城二縣極次貧民。皆加賑一月。其未經過之嶧縣平度州膠州高密昌邑五處被災稍輕。將極貧之民。加賑一月。○十七年覆准。浙江省仁和錢

塘等州縣廳衛所場秋禾被旱賑過災民屯竈  
貧生本色米三萬三千九百六十六石折色米  
二十六萬七千二百八十六石四斗各有奇。又  
給過籽本穀一萬四千三百三十四石七斗。籽  
本銀二十二萬九千二百六十八兩九錢各有  
奇。十九年

諭上下兩江上年被水地方。經朕多方籌畫。加意撫綏。  
但成災甚重。積水消涸。先後不齊。或尚有未盡耕耨  
之處。今年遇閏。麥秋較晚。青黃不接。為日更長。嗷嗷  
小民。良深廕念。著傳諭該督撫等。將被災州縣再行

詳查應如何再加分別賑糶之處。一面奏聞。一面酌量辦理。俾未盡涸出之區。得資餬口。○又

諭

江南淮揚徐海及靈虹睢宿一帶地方。上年被災甚

重。經朕降旨截漕撥帑。增給賑銀。多方籌辦。並敕地方官加意撫綏。災戶皆已得所。其積水漸消之地。亦皆次第補種。二麥可望有收。惟是今年閏月。節候較遲。麥秋尚早。例賑之期已將屆滿。窮黎餬口之資。更宜豫為區畫。著該督撫等就各州縣衛災地重輕。查明極次貧戶。再行分別加賑一月兩月。其毋庸加賑者。仍酌量平糶。以濟民食。○又奏准上江之宿鳳陽

臨淮懷遠虹靈壁泗盱眙五河等九州縣長淮  
鳳陽泗州等三衛下江之阜甯鹽城興化海浦  
陽山陽清河桃源安東高郵泰甘泉寶應銅山  
沛邳宿遷睢甯等十八州縣鎮江淮安大河揚  
州徐州等五衛無論極次貧民皆再加賑一月  
○又覆准安徽省壽州等處乾隆十七年秋被  
水災共賑過貧民貧軍貧生銀五萬二千六百  
六十九兩有奇○二十年

諭江南淮徐等屬連年被水原係積歉之區今窪地又  
復被淹民力必致拮据朕心深切軫念著該督撫等

速行查明被水州縣貧民應賑恤者分別賑恤所有  
涸出地畝尚可補種秋禾者即行借給籽種速令補  
種務俾口食有資災黎不致失所。又

諭

江蘇等各府屬今年被水成災朕心深為軫念已屢  
經降旨截漕撥粟俾賑糶所需務從寬裕其應賑戶  
口並令銀米兼賑但該處現在糧價稍昂著加恩每  
米一石加給銀二錢以敷買食至本年應運漕糧除  
已截留外現屆開徵該省既經被水米色顆粒自當  
稍減所有交倉之米並著不論紅白秬秠地方官酌  
量可收一體准予收兌此等米俟兌運抵通即先行

撥放俸餉。該部遵諭速行。○又

諭浙江杭湖紹等府屬。今秋雨水過多。偶被偏災。朕屢降旨令該督撫加意撫綏蠲緩。並截糧備用。現今已屆冬令。災民口食維艱。朕心深為軫念。著將被災較重之山陰會稽餘姚上虞安吉五州縣。極貧加賑三月。次貧加賑兩月。仁和歸安烏程德清長興武康諸暨蕭山八縣。曹娥金山鳴鶴下砂四場。湖州守禦一所。被災稍輕之處。極貧加賑兩月。次貧加賑一月。並准其銀穀兼賑。該處現在糧價稍昂。若照例酌給。猶恐小民不敷買食。再著加恩。每穀一石。折銀七錢。每

米一石折銀一兩四錢。該督撫等分委妥員實力查辦。毋任胥吏乘機侵扣。務使災黎均霑實惠。○又覆准。江南省上元等州縣。乾隆十七年夏秋水旱風潮。田禾被災。共賑濟災民銀七千七百六十六兩六錢。又賑恤倒房銀二千八百九十八兩各有奇。○又覆准。安徽省泗盱等州縣。乾隆十九年秋禾被水。賑過貧民貧軍銀一萬八千八百六十六兩六錢有奇。○二十三年

諭。去歲豫省衛輝等府被災地方。著將十分極次貧民。暨九分極貧民。再行加賑一月。俾得接濟麥收。○又



諭上年兩江災地。業經截漕蠲緩賑借。但賑竣後距麥收之期尚遠。貧民難以支持。朕心深為惻然。著將被災最重之清河等州縣。極貧各加賑三月。次貧各加賑兩月。其次重之豐縣等州縣。極貧各加賑兩月。次貧各加賑一月。又被災較輕州縣。無論極次各加賑一月。○又

諭上年直隸大名等府被災各州縣。業經降旨撫恤。賑借兼施。災黎自可得所。惟是例賑應至正二月為止。貧民仍不免拮据。著加恩將九十分之極次貧民。再各加賑一月。以示軫恤。○又

諭陝省榆林府屬。上年秋禾被災。著加恩將葭州等州縣被災八分之極貧。與九分之極次貧民。再行加賑兩月。以資食用。○又

諭上年山西交城等州縣秋收歉薄。著加恩再酌給兩月口糧。○又

諭甘省連歲辦理軍需。繼以雨澤愆期。不及播種。糧價自不免昂貴。即照例銀糧兼賑。不敷買食。著加恩於部價外。河東每石加銀三錢。河西每石加銀四錢。俾民間買食寬裕。○二十四年

諭甘省上年偶被偏災。著再加恩將河東之皋蘭等廳

州縣被災處所。無論極次貧民。災分輕重。俱一體加賑三月。○又

諭甘省風土貧瘠。兼之去冬未得透雪。麥苗未能徧種。著加恩再行加賑三月。以資接濟。○又

諭甘省上年被災各州縣。疊經加恩展賑。已至七月。其河州等四處。著加恩一體展賑三月。○又

諭陝省榆林等屬。頻年被災。著將七八分之極貧與九分之極次貧民。再行加賑兩月。○又

諭晉省各屬。偶被偏災。所需撫賑口糧。著加恩每石折銀一兩六錢。俾災黎買食充裕。○又

諭甘省折賑。向例每石給銀一兩。上年歲事歉收。已降旨河東每石加銀三錢。河西每石加銀四錢。今皋蘭等屬糧價尚未平減。賑糧折價俱於前加三錢四錢外。河東河西每石再各加給銀三錢。俾窮黎足數買食。○二十五年

諭甘省上年偶被偏災。著加恩無論被災分數。極次貧民。將皋蘭等十廳州縣。再加展賑。至麥熟後停止。靜甯隆德狄道三州縣。再加賑四月。靈州花馬池中衛河州碾伯五廳州縣。再展賑三月。○又

諭甘省被災各屬。業令撥運糧四十餘萬石。分貯賑糶。

恐有不敷著於鞏昌等府倉儲內再酌撥十餘萬石以備賑恤借糶之用。○又

諭上年晉省夏秋偶被偏災著將成災六分以上之陽曲等州縣無論極次貧民再行加賑一月仍照例折給。○又

諭上年陝省偶被偏災著將被災五分以上之定邊等六州縣無論極次貧民俱加賑兩月被災五分之安定等三縣俱加賑一月照例折給以資接濟。○二十

六年

諭去歲湖南零陵等州縣偶被偏災著加恩無論極次

貧民再行加賑一月。又

諭上年淮揚等處偶被水災。著將被災較重之阜甯等州縣。無論極次貧民。俱加賑兩月。其被災次重之清河等州縣。加賑一月。以資接濟。○又

諭湖南省被災州縣。今東作方興。麥秋尚遠。著再加恩。無論極次貧民。各加賑一月。○又

諭滇省新興江川二州縣地震成災。著加恩。照乾隆十九年恩旨。於常例之外。加倍賑給。務令實心妥辦。○

又

諭河南祥符等縣河水漫溢。特派大臣會同巡撫等相

度辦理。朕思被水情形。與被旱不同。蓋旱形可以豫知。地方官先事詳查戶口。造冊彙報。尚可需時。至於水災猝至。室廬一空。災民嗷嗷。豈能遑待。著大學士劉統勳等。會同該撫嚴飭地方各官。遇應行加賑之地。隨查隨賑。並於被災較重州縣。各按四鄉分設粥廠。俾得就近餬口。不致失所。○又

諭直屬冀州衡水武邑三州縣。被水較重。著加恩照例撫恤。俾災黎毋致失所。○又

諭直隸毗連豫省之開州等州縣。秋雨過多。田禾淹浸。著照例撫恤。並先給口糧。以資安頓。○又

諭滇省江川新興二州縣一年之內兩次被災頗重深堪軫念著加恩將該二屬應賑之項加倍散給至毗連之甯州河西等屬被災雖輕亦著從優撫恤○又奏准各省折賑米價有奉

旨加增折給者以加增之日為始其奉

旨以前仍按定價折給事竣報銷○二十七年

諭去秋山東被水偏災各屬據奏被災較重之曹縣等五州縣著加恩無論極貧次貧俱加賑一月其濱河次重之齊河等十五州縣亦著展賑一月以資接濟

○二十八年



諭上年直隸各屬雨水過多著加恩將大興等二十八州縣內之六分災次貧及毗連災地之五分災極貧戶口一體給賑一月○又

諭上年山東濟南等屬被水稍重著加恩將齊河等三十州縣衛極貧戶口除前加賑一月外再予加賑一月其餘次貧各戶並著通行加賑一月○又

諭直屬辦理賑務著再撥部庫銀八十萬兩以濟賑務之需○又

諭直屬州縣上年被災較重著加恩將被災六分以上各州縣無論極次貧民再予展賑一月其被災五分

者。例不應賑。並格外加恩。亦無論極次貧民。特予加賑一月。以資接濟。○又

諭。直隸去秋被水。著再加恩。截留河南山東新運漕糧十五萬石。分撥水次附近被災州縣。俾得銀米兼賑。

○又

諭。前因直屬去秋被水。降旨將被災六分以上各州縣暨被災五分者。概予展賑一月。其通州等三州縣不應給賑村莊。確查實在貧民。均予加賑一月。○二十九年

諭。上年東省濟甯等州縣衛成災地方。無論極次貧民。

著各展賑一月。○又

諭甘省皋蘭等屬。上年夏秋俱有偏災較重之處。著加恩將永昌等三縣。無論極次貧民。各展賑兩月。其皋蘭等十九廳州縣。無論極次貧民。各展賑一月。以資接濟。○又

諭甘肅省續報翻種秋禾復被偏災之金縣等處。著加賑一月。○又

諭甘肅上年偶被偏災。著加恩將武威縣再行展賑兩月。山丹縣展賑一月。○又

諭韶州府等屬先後閒有被水之處。惟英德縣地方情

形較重。著加恩將英德縣酌賑一月口糧。其南海等縣民修圍基。著各按在工民夫酌給口糧。以資力役。

○又

諭黃梅等處。因大雨時行。江水暴漲。居民田廬猝被水淹。所有乏食民人。勢難緩待者。即隨查隨賑。撫恤一月口糧。其被災稍輕者。酌量借給籽種口糧。以資接濟。○三十年

諭山東濟南武定等屬。間有被水地畝。著加恩將被災稍重之齊河等十五州縣極次貧民。概予加賑一月。

○三十一年

諭甘肅被災較重之靖縣等十三處。無論極次貧民。俱著展賑兩月。被災稍重之皋蘭等十五處。無論極次貧民。俱展賑一月。○又

諭浙江天台等三縣。去秋晚禾閒有被旱。著查明貧乏戶口。散給一月口糧。至仁和等縣歉收地畝。於春耕時按畝賞給籽本穀三升。免其追繳。令各乘時力作。○又

諭湖南武陵縣。此次被水頗重。著即查明戶口。先行撫恤一月口糧。俾資接濟。○又發庫帑銀三百萬兩。存留甘肅。以備賑糶。○三十二年

諭去歲江南濱河各州縣黃水漫溢偶被偏災著加恩將銅山等州縣衛被災極貧加賑兩月次貧加賑一月。又

諭昨秋東省偶被水災著將惠民等屬無論極次貧民再行加賑一月。三十三年

諭上年江西省南昌等縣偶被偏災業經照例賑恤今念賑期已竣正值青黃不接之候著加恩將南昌等九縣被災七八九十分之極貧與被災九十分之次貧各加賑兩月其湖口彭澤瑞昌都昌四縣偏災較輕所有被災七八九十分之極貧及被災九十分之

次貧。各加賑一月。○又

諭上年湖北省夏秋閒被水災。著加恩將被災較重之黃梅等縣衛。無論極貧次貧軍民。概行加賑一月。○

又

諭江南上元等州縣衛。被災七八分者。無論極次貧民。均加賑一月。其九分十分者。極貧加賑兩月。次貧加賑一月。○又發部庫銀四十萬兩。解交直隸賑濟飢民。○三十四年

諭直隸各屬。上年閒被水災。著加恩將霸州等七州縣。被災六分之極貧。及七八九十分之極次貧民。均加

賑一月。又災分稍次之任邱等三縣內成災九分村莊極次貧民均著於停賑後各加賑一月。○又

諭江蘇上年得雨稍遲收成歉薄著加恩將鹽城泰州東臺興化四州縣被災九十分之極貧各加賑一月

○又

諭豫省上年被旱成災著加恩將光州等州縣被災九分極貧加賑兩月九分次貧七八分極貧各加賑一月。○又

諭上年直隸近水州縣窪地閒被偏災著撥通倉米二十萬石以為各處加賑糶借之用。○又



諭滇省夏閒被水過多。低窪地畝。不無漲漫。著將鄧川等州縣被水極次貧民。俱加賑一月。○又

諭安徽上年得雨稍遲。閒被偏災。著加恩將合肥等十州縣被災十分之極次貧。九分之極貧。各加賑兩月。其被災九分之次貧。八分之極貧。各加賑一月。廬州等五衛。並照屯坐州縣一體查辦。